

natus atque Aetherio, episcopis missas legerit, dubitare non poterit.

## CAPUT XI.

*De tribus aliis episcopis Ecclesias suas itidem deserentibus.*

Ecce dum illis viginti quatuor episcopis, quos superius enumeravimus, tres istos, qui auctore B. Gregorio, suas dimiserunt Ecclesias, copulamus: beatos præterea Gaudiosum atque Quodvultdeum, Sergium quoque Damascenum metropolitam his omnibus superaddimus, triginta procul dubio, qui pro divino amore suis renuntiaverunt sedibus, episcopos 439 invenimus. Dicat mihi perscrutator veterum, dicat historiarum, vel annalium quilibet indagator, tot sanctis patribus pastolarem custodiām deserentibus quis unquam apostolicæ sedis pontifex obstitit? Quis eorum quemlibet vel per legationis apices reprehendit, vel per synodalem sententiam condemnavit? Dicat, inquam, vel cum nullatenus possit invenire quid asserat, procacem linguam suam dentibus mordeat, non me injustis detractionibus rodat.

An non et minor Benedictus papa (12), quem supra retulimus, apostolici se culminis administratione privavit, successoremque sibi Gregorium (13); qui Gratianus dicebatur, in Romana sede constituit? Super quibus præsente Henrico imperatore, cum disceptaret postmodum synodale concilium, quia venalitas intervenerat, depositus est qui suscepit; non excommunicatus est qui deseruit.

Porro autem et B. Benedictum instar magni eiusdem pontificis, possumus ad exemplum imitacionis inducere, qui videlicet commissum non ambigitur regimen dimisisse.

Leo quoque Nonantulanus abbas ad memoriam rediit, qui dum clericalem adhuc speciem gereret, jamque devotione peracta, ab Hierosolymis remeasset, sic vitam suam instituit, ut nil aliud præter unum duntaxat a sinum possideret. Cum hoc quotidie saltus, et pascua circumquaque perlustrans, materias congerebat, quibus ad iequisita naturæ necessaria fratribus anitergia ministraret. Peracto itaque glorifice hujusmodi opere manum, psalterioque cum ipsa simul exercitatione decurso, protinus ad offerenda Deo sacra mysteria non sine

A multis lacrymis sanctus presbyter accedebat. Postmodum vero ad monasterii regimen violenter attractus, aiebat, (quod infelix frequenter et ipse deploro) Jesum, inquiens, per pedes tenui, et nunc miser et cæcus sæculi molas volvo. Vixque peracto biennio, in manu Ottonis, qui tunc imperii sceptra regebat, pastoralem 440 baculum reddidit: deinde apud sanctum Bonifacium intra Romana mœnia perseverans, ex omni, quod sibi vitæ hujus residuum fuit, nil aliud, quam æternæ vitæ sibi stipendia procuravit. Ad cuius postmodum sepulturam cæcus veniens, luci pristinæ asseritur restitus.

Verum ne copia deficiente pontificum, ad exempla minus congrua convolasse notemur abbatum, ut non diversum nomen apponam, Leo Ravennas B archiepiscopus, mox ut paralysis ejus ora constringit, cathedram sprevit, siveque privatus fere quadriennio supervixit. Cui videlicet Fridericus, tertio Ottone feliciter imperante, successit, eique non inopes, quibus aleretur, possessiones Ecclesiæ delegavit.

Horum igitur, aliorumque Patrum auctoritate suffultus, episcopatui simul et monasteriis in sanctis manibus vestris irretractabiliter abrenuntio, omnique jus a me movendæ in posterum quæstionis ac repetitionis abscondo; et quia pro innumeris peccatis meis non sum dignus in ecclesiastica dignitate persistere, det mihi divina misericordia per sanctas orationes vestras, venerabilis pater, eo ipso vitæ quod restat in luctu et pœnitentia permanere. Confiteor enim, quia criminosis simul et vitiosus ad honorem hunc, et non sine reprehensione perveni, et in eo reprehensibiliter vixi: ideoque mihi tutum visum est, ut ipse me potius sponte depонerem, quam ante tribunal tremendi judicis in conspectu omnium angelorum et hominum, depositionis sententiam sub æterna damnatione subirem. Sed jam ista sufficient: Omnipotens Deus, qui incomprehensibili dispensationis suæ consilio, et me ab obtinendi regiminis ambitione dejecit; et vos ad ecclesiastici culminis summa provexit, sancto cordi vestro cuius est inhabitator, inspiret talia mihi per sacras litteras mandata dirigere, quæ meis votis meisque valeant desideriis concordare.

*Sit nomen Domini benedictum.*

(12) Hujus nominis nonus.

(13) Hujus nominis sextum.

## 441-442 OPUSCULUM VICESIMUM.

## APOLOGETICUS OB DIMISSIONEM EPISCOPATUM.

ARGUMENTUM. — Excusat se B. Petrus Dam. apud pontificem, quod tenuitatis suæ conscius, episcopatu se abdicavit; ne quis autem illi hoc inconstantiae ascriberet (non enim licet semel susceptum deponere regimē), breviter respondet, et multorum Patrum exemplis, qui delato episcopatu uti noluerunt, ostendit magis tutum cepisse consilium tanto onere se levandi: rem præterea arduam, maximeque laboriosam aliis præesse, et episcopatus fungi munere declarat.

Dilectissimis apostolicæ sedis electo, et virga Assur HILDEBRANDO, PETRUS peccator monachus servitatem.

Ferunt, qui in rimandis rerum desudavere natūris, hoc lyncibus naturaliter insitum, quia cum post

terga respiciunt, protinus illum qui præcesserit. Continuo videlicet, et mens simul perdit quæ oculus videre desierit. Et cum hæc bellua tanto visus acumine ferarum genus omne præcellat, ut et lapideos penetrare parietes voleat, hoc laborat vitio; quia quodcumque illud est, a quo semel oculos avertit, ad memoriam postmodum non reducit. Quorum videlicet animalium quamdam vobis esse similitudinem dicerem, nisi me magnitudinis vestræ reverentia prohiberet. Mirum est enim, quia tam acuta prudentia, imo, quod longe gloriosius est, tam sincera et serventissima charitas, quæ me suscipit affectuose præsentem, nunquam sive per stylum, sive per verbum visitare dignetur absentem. Porro quoniam a vobis scripta non mereor, si mihi cum aliis negotiis ageretur, dicerem; quia illa, quam Apostolus dicit, charitatis epistola, non est apud vos in tabulis cordis carnalibus scripta (*II Cor. iii*), sed imis, ut aiunt, ceris erasa. Sed dum attendo quid loquar, considerandum est nihilominus quibus loquar. Quapropter dum uti loquendi libertate non audeo, ori digitum superpono. Querela igitur expostulationis hucusque producta, in quod propensiis scatet animus, breviter inferam.

#### CAPUT PRIMUM.

*Quod Petrus Damianus duorum episcopatum curam habuerit.*

Benedicta omnipotens dispensatio conditoris, quia ad vos nuper ascendens duorum episcopatum, unius regendi, alterius visitandi mole depresso, præempta Alpium juga transmisi, moxque sarcina tribulationis abjecta, exoneratus et liber, ad dilectam solitudinem tanquam fugitus possuminio repedavi. Libet itaque sub quadam mentis energia, quasi diu stipitibus attritos agitare pedes, durisque catenis edomitas sublevare cervices, illudque propheticum alacriter decantare: «Dirupisti, Domine, vincula mea: tibi sacrificabo hostiam laudis (*Psal. cxv, 17*).» Nostis plane, tumque tenetis hæc in me projecta fuisse onera, non suscepta; et, ut ita loquar, retiaculum non ingressus sum, sed violenter operatus. Quapropter occasione nacta, pondus libenter abjeci, quod ultroneus ante non subii. Et quia vos apostolica sedes, vos Romana estis Ecclesia, ad deponendum reddendumque quod bajulare nequieram, integrum mihi visum est non adire fabricam lapidum; sed eos potius, in quibus viget ipsius Ecclesiæ sacramentum. Sub persecuzione quippe Judaica ubique erant apostoli illuc esse primitiva dicebatur Ecclesia. Nunc etiam cum Simon ille, veternosus videlicet trapezita, malleos et incudem reparat, cum Romanam urbem velut officinam sibi per monetarios pestiferæ negotiationis usurpat, quo vos Petrus vobiscum fugiens attrahit, illuc esse Romanam Ecclesiam omnibus indubitanter ostendit. Unde **¶¶¶** ego cum ecclesiasticum vobis regimen renuntiare disposui, non erravi; quia Romanæ, quæ vos estis Ecclesiæ, quod suum erat

A digne restitu: et ut vobis me confessum esse confitear, pro hac refutatione centum annorum pœnitentia mihi est consequenter injuncta; per illa nimirum remedia, quæ monasticis sunt regulis instituta. Quod si parum videtur, vos etiam superaddite: ultro etiam et carcerali, si placet, custodiæ mancipate. Post tot quippe vagationis et noctis libertatis excessus, quid restat, nisi ut me religationis atque silentii censura coercent? Sed hic forte blandus ille tyrannus, qui mihi Neroniana semper pietate condoluit, qui me colaphizando demulsi, qui me certe aquilino, ut ita loquar, ungue palpavit, hanc querulus erumpet in vocem: Ecce latibulum petit, et sub colore pœnitentiæ, Romæ subterfugere quærerit accessum; lucrari machinatur de inobedientia otium, et cæteris in bella ruentibus hic sibi degeneris umbræ quærerit opacum (14). Sed hoc ego sancto Satanæ meo respondeo, quod filii Ruben et Gad Moysi ductori suo responderemus noscuntur: «Nos, inquiunt, armati, et accincti pergemus ad prælium ante filios Israel, donec introducamus eos ad loca sua; parvuli nostri, et quidquid habere possumus erunt in urbibus muratis propter habitatorum insidias; non revertentur in domos nostras usquequo possideant filii Israel hæreditatem suam, nec quidquam quæreremus trans Jordaniæ, quia sjam habemus possessionem nostram in orientali ejus plaga (*Num. xxxi*).» Hoc itaque modo comitaturus quidem vos, arma corripio, sed vobis duce Christo, post bella victoribus, mox recesso. Hoc igitur dicam electo Domini, quod Berzelai quoque Galaatides descendens de Rogelim David locutus est regi: «Paululum procedam famulus tuus ab Jordane tecum; obsecro ut revertar servus tuus, et moriar in civitate mea (*II Reg. xix*).»

#### CAPUT II.

*Quod episcopatus deponi possit aliquando.*

Hic mihi fortassis objicitur, semel acceptum dimitti regimen non licere. Ad quod breviter dico quod sentio; quia plerique pontificatus jura non deserunt, et de sinistris sunt: quotquot autem legimus recta intentione dimisisse, certa spes est eos de æternâ cum Christo societate gaudere. Neque hoc dicimus, ut passum deseriri episcopatum liceat, nisi videlicet id fieri necessitas magna compellat. Enimvero beatus Valerius dum sibi providet successorem, magnum Augustinum Hippónensi Ecclesiæ inthronizat antistitem. Lucidus Ficoclensis episcopus dum propinquum sibi obitum imminere cognoscit, ad cœnobialis portum convolat ordinis, ac sacerdotalis insulas dignitatis monachicis mutat induviis: et ut noveris quid sibi conversio ista contulerit, sicut authenticâ Registri testatur historia, sub ipso migrantis obitu Spiritus sancti gratia letissimo relucebat in vultu. Cui nimirum et antequam moreretur, beatus apostolus Andreas apparuit; et qua hora migratus esset ex corpore, nuntiavit.

**¶¶¶** Quid beatum Adelbertum martyrem dicam?

(14) Hildebrandum S. R. E. Archid; tacite intelligit.

Qui nimirum quoniam Boemensis Ecclesiæ postpōsuit cathedram, monachum induens, triumphalem martyrii meruit invenire coronam? Utque ex industria de cæteris sileam, quidam sanctus pœnitens, cuius me ad præsens vocabulum fugit, jam ante seplennium sere episcopatu dimisso, tandem angelo visitante præcipitur, ut ad episcopatum redeat; sed recusat, donec admonente eodem angelo, beatus advenit sub celeritate Remigius. Sic itaque ne deceptio potuisset forte subripere, et iam tuta formidans, humano cessit imperio, qui ad angelicum prius oraculum rigidus stetit.

Episcopus etiam illè Sabinensis, qui solium pontificale deseruit, et Farsense monasterium, contempta sacerdotali dignitate, construxit, quam nobilis in Christo vir fuerit testis est antiqua traditio, quæ sanctitatis ejus insignia celebrat; testis moderna devotio, quæ piam ejus memoriam in benedictione frequentat. Quanti scilicet et prius et postmodum in eadem sede usque ad vitæ terminum perdurarunt, et tam operosum fructum Deo nullatenus attulerunt.

Nec te, felix Bonite, præteream, qui hac duntaxat occasione percepta, quoniam de manu regis, laici videlicet hominis, traditionem Ecclesiæ te suscepisse contigerat, cathedram contempsisti, atque ad remotionis vitæ custodiam te protinus contulisti. Quid, rogo, iste facheret, si tormenta, quibus nostri cruciantur episcopi, et ipse perferret? Si scutatorum et lanceatorum turmæ post equitantis terga consuerent? Si eum tanquam gentilis militiæ ducem in procinctu positum armati undique manipuli constiparent? Et quem decuerat reverenter incedere cum choro psallentium, audire cogeretur hinc inde perstrepentium innitus armorum? Unde sit, ut modo pontificem non comitentur, ut dignum est, diversi clericorum ordines; sed castra potius, et armati telis vibrantibus bellatores. Pensemus etiam quale hoc sit, quia haec nonnulli et inviti perferunt; et tamen eos, quos tolerant, prædiis ac facultatibus Ecclesiæ, velint nolint, charius emunt. Quotidie regales epalæ, quotidie apparatus, quotidie nuptiale convivium, et unde refrigerare debuerant indigentes, rabentium tabularum recreant gestatores. Et cum episcopus dispensator, et promus debeat esse pauperium, ad eorum mensam affluentibus deliciis, alieni ructant; cum et illi, quorum est tota substantia, procul exclusi, famis inopia contabescant.

### CAPUT III.

#### *Contra ecclesiastici peculii dilapidatores.*

Inter omnia porro haec mala illud excedit, et diabolica propemodum videtur æquare nequitiam, quia prædiis in militiam profligatis, omnique possessione terrarum, insuper etiam et decimæ, ac plebes adduntur in beneficium secularibus. Quæ profecto liberalitas in honesta, et indigentibus admittit unde vivant; et diœcesanos etiam deterret, ut deci-

A mas non persolvant. Una scilicet res et illis subtrahit corporale subsidium, et istis periculum providet animarum. Quod totum in male munifici caput redundare, nulli dubium est; si tamen eum ad hoc propria vanitas trahat, non necessitas antiqua compellat. Et quidem plurima suppetunt, quæ de episcoporum multiplicibus ærumnis apponem, nisi me epistolaris compendii regula prohiberet.

Sed, o facinus! adeo me sola sedes apostolica cruciat, ut ab his omnibus me dicendis avertat, In qua nimirum sede, cum admirari soleamus reverendæ majestatis antistitem, nunc despicibilis personæ cernimus Mitionem (15). Hæc venerabilis ille vir expertus fuerat, Petrus videlicet Apsarensis [Ausarensis uti in sup. op. corr.] episcopus; qui episcopatum dimisit, et de Slavonico regno Italiæ navigans, littoribus Anconitanæ urbis applicuit. Hic mihi, dum totius circa se regni reverentiam conquestus exponeret, ac molestæ inquietudinis tædia numeraret, inter cætera unum intulit, quod vos latere non patior. Quidam, inquit, degener quidem moribus, sed majorum titulis insignitus, sui generis consanguineam nuptiali sibi foedere copulavit. Quid plura? Prohibitus persistit, excommunicatus adhæsit, totumque ecclesiastice censuræ vigorem, nugarum puerilium fabulas deputavit. Cui certe hoc ad divinæ indignationis indicium contigit, ut panes de nuptialibus mensis in plateas ante canum ora projecti minime tangerentur. Insuper, o divinæ animadversionis pavenda severitas! dum rigidus stat, dum præceptis se sacerdotalibus non humiliat, qui vigilare sibimet ad salutem noluit, in cubiculo dormientem repente de cœlestibus irruens fulgur extinxit. Sic sic divini furoris expertus est moriendo sententiam, qui vulneri suo dum viveret adhibere contempserat medicinam. Hoc autem diximus, ut quam sanctæ auctoritatis vir ille fuerit, qui episcopatum deseruit, monstraremus.

Sed tum ista prosequimur, illud etiam nobis consequenter occurrit, quod et ipse nobis nuper, venerabilis Hildebrande, dixisti: et quanquam non magnopere hujus videatur esse negotii, quod versatur in manibus, tamen dum quomodolibet hoc apicibus tradimus, ne vorago funditus oblivionis absorbeat, quasi rem fluctuagam paxillulis alligamus. Ut enim te retulisse memini, haec tibi, ut ejusdem verba ponamus, Novariensis Ecclesiæ narravit episcopus. Cum, inquit, in Teutonicorum partibus cumdam episcope conviator incederem, et imminentे jamjam refectionis hora, ille quid mihi quasi decenter apponere non haberet, æstuare coepit et anxie querere unde mihi posset in itinere positus, subvenire. Cumque hinc indigentia stringeret, illine charitas animum dilataret, in arce positus qui prorsus ageret ignorabat; cum ecce repente grues, ut litteram in vicem congruentes exprimunt, parisi

(15) Cadaloum intelligit.

serie quasi diversa utrinque sub uno duce castra componunt, super verticem nobis turmatim voluntare cœperunt. Tunc episcopus in servore fidei constanter erectus, ait : Domine, præcipe unam de gruibus istis ad nos dejici, ut servus tuus de benedictionis tuae munere satisfaciat charitati. Mira exauditionis divinæ cœleitas ! vix verbum ore deponitur, protinus **446** non parvi corporis grus terra tenuis ante ora nostra demergitur; sicque fides, quæ per dilectionem operabatur, impletur. Hæc tibi referenti continuo percunctatus, aio : Eratne spiritualis ille episcopus ? Tu, ut neseio, quo paeto didiceras, carni propriæ vivere hominem, respondisti, ut liquido patet, non vitæ rectitudinem, sed fidem charitati conjunctam hanc obtinuisse virtutem.

Addidisti etiam, quia beato Leone (16) sedis apostolicæ præsule referente, cognoveras, æque carnaли et inconsideratæ conversationis episcopum extitisse, qui tantam extra meritum gratiam a Domino fuerat consecutus, ut virtutes ac signa frequenter ostenderet; ulro etiam cum magnæ auctoritatis imperio ex obsensis corporibus dæmones effugaret. Inter quæ nimiruni signa virtutum, et illud aliquando contigit, ut eodem sanctæ memoriæ Leone præsente, dæmoniacus astitisset; cumque præfatus episcopus nequitæ spiritum abire præcipiteret, ille autem quibusdam verbis pervicatis superbiæ resultaret, tandem per nomen Christi terribiliter adjuratus, reniti ultra non potuit. Cumque caput miseri hominis huc illueque concuteret, capillos in altum pavendo quodam horrore subrigeret, os quasi ad evomendum quibusdam conatibus aperiret, protinus se objecit episcopus : Nequaquam, inquit, per os egredieris, ut niteris; omnino frustrabitur quod moliris, per posteriora te exire præcipio : nam oris tibi aditum non permitto. Per sordidos igitur meatus, immunde habitator, egredere, et fœda post te, ut dignus es, vestigia derelinque. Vix verba compleverat, et continuo nequissimus spiritus fluxu ventris ejectus est.

#### CAPUT IV.

*Episcopi cujusdam misericordiam in pauperem miraculo Deus remuneratur.*

Alius item episcopus, ut et ipse dixisti, oppidi sitiens, vinum sibi afferri præcepit. Cumque pincerna totum quod erat in vaseculo funditus exhaustisset in poculum, et episcopo detulisset, ecce pauper importunis illud sibi dari precibus flagitabat, dicens, quia præ ariditate nimia nisi biberet, cominus exspiraret. Econtra minister asserebat, et nil se in vase residuum reliquisse, et in eo loco vinum aliud reperiri nullatenus posse. In his igitur fortis episcopus angustiis deprehensus, et cum hinc vide licet sitim differre non posset, illinc autem se biberet, alio periclitante, impium judicaret, avertit se a se, fratrique laboranti in necessitate succurrerit. Præce-

A pit igitur pauperi vinum dari; sed jam quo magis spes bibendi omnino defecerat, eo sitis episcopi atrocius sæviebat. Mandavit itaque ministro, ut vi- narium vas requireret; si forte aliquam consolationis stillam, vel peregrinam reperiret. Qui diutius abne gans, nihilque se reservasse constanter affirmans, tandem non spe erectus, sed imperio magis oppres sus, paruit; et vas, quod vacuum reliquerat, vino plenum, nimirum admiratus, invenit.

Abbas quidam, ut mihi relatum est, suavis **447** edulii concupiscentia ductus, naupredam sibi præcepit acquiri. Cumque ministri dicerent, hoc genus eo loci difficile posse reperiri, exstitit qui diceret, unam tantum in venalibus Naupredam se vidisse propositam, nullo pacto minus quam viginti nummorum Papiensium solidis coemendam. Jussit abbas numerari pecuniam. Coquorum autem diligentia perfunctus, et laute decoctus abbati piscis apponitur; sed antequam tangeretur, ecce pauper ad januam hoc potissimum sibi dari quod abbati esset appositum anxie postulabat. Mox, ut erat, integrum piscem, nihil hæsitans vir Domini, mittit ad pauarem. Illico pauper, qui videbatur cum ipsa paropside plena pisce, in sublime se extulit; et librata manu, velut exenium portans, cœlum cunctis vi dentibus penetravit. Unde liquido comprobatur, quia quod indigentibus datur, Deo transmittitur, et quod in sinu pauperum occultamus, in cœlo reponimus.

Illud etiam, quod nunc addimus, quanquam non sit miraculum, ab ædificatione tamen, cui famulatur omne quod scribimus, non est alienum. Episcopus quidam naupredam sibi parari præcepérat, qui paulo post dum inter ipsa missarum solemnia saeris altaris devotus assisteret, ecce naupredæ memoria illecebrosi gustus eum tentavit affectu. Ille, ut erat insignis animi, talia se pati posse in obtutibus occulti, et omnipotentis inspectoris erubuit, expletisque regressus officiis, febreticum animæ piscem pauperi tradendum esse mandavit. Sic profecto canicula voluptatis, quæ sub mensa corporis, utcunque potuisset vivere, ad sancta sanctorum impudenter irrumpens, pœnitentiæ fuste mactata, meruit interire.

Pauper quidam paterfamilias unum duntaxat num D mum in loculo possidebat, quem ad emendum ali quid, quod cum pane comedere, expendere gestie bat. Cumque siccus et aridus a laitoribus alimentis, hoc diu negotium in mente versaret, interim pauper advenit, misericordiam postulavit. Ille hærens animo, velut in quodam erat meditullio constitutus. Nam si daret, carni metuebat afflictæ; si retineret, culpam incurrire formidabat denegatae misericordiæ. Tandem vicit spiritus carnem, et evangelicam imitatus viduam, sub pauperis specie hono debitori Deo suam fenerat quantitatem (*Marc.*

xii; *Luc. xxii*). Redi dñmum, panis, qui solebat, apponitur. Pauper quidem mensa, sed bona spe dives erat conscientia. Damnum siquidem carnis compensabat lucro pietatis; cum ecce vir quidam ignotus, et quem antea nunquam viderat, festinus et anxius ligatos linteo in manu ejus viginti denariorum solidos posuit, dicensque sibi a Domino suo missos, tanquam qui ab eo exspectaretur, incunctanter abscessit. Cumque hic attonitus vellet inquirere, ille disparuit.

## CAPUT V.

*Damianus ob ætatis gravitatem episcopatus labores refugit.*

Idecirco autem nomina hominum non appono, quoniam ordo peractæ rei facilius **448** hæsit animo; nomina vero, curis aliis intervenientibus fateor, intercepit oblivio. Nec magnopere curamus videri aucupes nominum, dummodo non excidat series et ordo gestorum; quanquam et hæc eadem gesta, quæ scribimus, quia in transitu audire nos contigit, utrum inoffensam fidei lineam teneant, certum per omnia non habemus. Ne igitur sine nominibus digesta narratio nares fastidiosis lectoribus contrahat, a talibus interim supersedeo. Et certe salubrius est, ut omiissis omnibus, ad me redeam, me defleam, me jugiter meis oculis anteponam. Ecce enim jam oculi caligant, et solito amplius phlegmatis humores abundant. Rugæ subeunt, et dentium ruinam gingivæ minantur. Caput denique, quod canis hactenus spargebatur, cigneo jam albore nivescit; vox raueit, virtus deficit; et, heu pro dolor! sola in me vitiorum radix ignorat penitus senectutem. Enimvero quotidie mortem præ oculis teneo, et jam tribunali tremendi judicis quodammodo præsentatus assisto. Jam sub quadam mentis imaginacione perversi spiritus truci vultu, exhorrenda specie me sub extremo spiritu palpitantem terribiliter impetunt, jam sancti angeli blandi, ac nivei, quasi qui auxilientur, accedunt.

Quiddam porro non longe antehac evenisse comperi, quod dum mihi saepe movet mentem, solet exaggerare formidinea. Quidam namque pœnitens sub peregrino habitu in nostris partibus exsulabat: qui perquisitus, quæ eum exsiliari culpa compellebat: Cum convicaneo meo, inquit, ad ligna cædenda pergebam, et ecce trabalis magnitudinis serpens duobus attollens squamosa colla capitibus, sinuosis flexibus obrepebat. Qui nos ut eo ambulantes aspergit, continuo scintillans oculis, et tanquam linguis exacuens ora trisulcis, in nos impetum fecit. Cui protinus conviator meus librata securi, unum caput abscidit, moxque ferramentum ex ejus manibus cecidit. Protinus serpens in furoris rabiem implacabiliter effratus, in sublime se erigit, quod solum remanserat caput attollit, auctoremque proprii vulneris mordicus apprehendit; quem mox ut invasit, sinuosus cum spiris implicuit et involvit, totoque hominem suis viribus vindicans, in subterraneæ specus latebras asportavit. Sed dum tra-

A heretur ille, quod solum poterat, me flagitat, in me clamoras voces ingeminat, ut vel ipse sibi promptus adjutor accurrerem; vel securim, quæ in meis erat manibus, porrigerè festinarem. Ego autem infelix et degener, ultricibus flammis obnoxius, et ipse potius a serpentibus merito devorandus, vae militi homicidæ! contremui; et cum manibus esset agendum, causa dictante, non pedibus, fugam paravi; ideoque a sacerdotibus injunctum mihi hoc exsiliū patior, meque ut revera mortis illius auctorem deflere compellor.

Quæ nimirum gemendæ calamitatis historia ita totum cor meum tremefacit et concutit, ut immensam cordis mei formidinem, nec stylo tradere, nec valeam sermone proferre. Meditor enim saepe, ecce homo, et bestia, duo pariter in spelunca. Non mediator intervenit, non ereptor accedit, ferinum sane cor pietas **449** non emollit; præsertim cum rabidæ voracitati hoc etiam superadditur, ut illæ contumelæ gravis altio compensetur. Quæsò, quæ rei hujus tunc species erat, imo quæ mens miseri hominis esse poterat, cum præda factus esset hosti nescio misereri; cum evadendi spes nulla superesset, sed potius cruentis dentibus in escam traditus, ferinam protinus ingluviem satiaret? Hujus ergo formidolosi casus speciem in mea saepe mente depingo, moxque draconem illum totius crudelitatis auctorem, quomodo rapiat ac devoret animas, pavida consideratione pertracto, illum saepe versiculum repetens, quem Propheta cantabat: « Ne quando, inquit, rapiat ut leo animal meam; dum non est qui redimat, neque qui salvum faciat (*Psal. vii*). » Tam brevis scriptura quam longam formidandi materiam sanis mentibus præbet?

Porrò autem et ante annum in non longinquæ ab hac regione villa contigisse dicitur, quod quidam agriculta vix erumpente crepusculo, mature surrexit, enormis draconem magnitudinis vidit, quem quia lignum putavit, mox se super eum ad sedendum quasi in trabe composuit. Commota protinus bestia caput attollit, hominem cruento ore pervadit, sive viventem sub momento rabida voracitate deglutiit, et ut corda nostra gravior adhuc formido concutiat, atque ad metuenda super nos divina judicia pervigil nos sollicitudo compellat; plerumque videmus honestioribus ac juste viventibus viris ista contingere, cum econtra carnales et incompositi videantur homines, ut supra meminimus, etiam virtutibus corruscare.

Nam, ut non diutius immorer, quidam ab Hierosolymis rediens; hoc sibi suisque comitibus contingisse narravit; quia cum itineris labore defessi, seus viam nocte quiescerent, repente leo terribilis dormientibus supervenit. Presbyter autem piæ opinionis, et honestæ vitae, qui etiam quater jam a Dominicæ sepulturæ visitatione redierat, sociis undique circumfusis medius quiescebat. Irruens igitur immanis bestia, neminem ex his qui sibi prius occur-

terant, tetigit; sed cæteros supersiliens, et tanquam projecta ligna contemnens, solum presbyterum signanter appetiit, præcipitanter invasit, cæterisque leonibus, qui non procul aberant, prædam suam cruentus venator exposuit. Quem clamitatem, et sociis audientibus horribiliter mugientem, subito devoraverunt; et e vestigio conviatores ejus usque ad turrim, in quam tremefacti concenderant, sunt secuti. Quod utique infirmis mentibus satis videtur esse terribile, ut inerentes præmia virga coerceat, et super eos qui digni sunt gratia cœlestis invigilet disciplina.

## CAPUT VI.

*Quod servus Dei civitatem conflagrandam prædicat, sibi ipsi vero non consulit.*

Illud etiam non dissimili dignum videtur esse formidine, quod religioso quadam Pisanæ diœcesis abbe referente, cognovi (*Vide scholia ad calcem opusculi*). Aiebat plane quia proxima hac ætate transacta contigit, 450 ut esset in quadam Teutonicorum urbe servus Dei sanctæ conversationis, et bonæ famæ, qui juxta monasterium in cellula morabatur. Huic sane revelatum est, quia nisi populus per pœnitentiam quantocius se a sua pravitate compesceret, infra triginta dies tota eorum civitas incendio subjaceret. Qui nimirum visionis suæ mysterium non solum episcopo civitatis innotuit, sed et per omnem populum sine mora divulgare curavi. Illi autem in pravitatis suæ malitia perdurantes, virum Dei arbitrati sunt delirare, et intentatas Dei minas omnino parvipendentes, designati sunt sua facta corrigere. Torro vir Dei preiosiora quæque monasterii jubet in recessus abditos convehi, ubi possent ab ignibus illibata servari.

Quid verbis immoror? Tandem lugubris ille dies advenit, et a septem urbis regionibus ultor ignis exoritur. Et ecce monachi ad servi Dei cellulam anxie proruunt, eumque imminente periculo, non segniter exire deposunt. Ille autem recusat omnino, divinoque judicio cuncta committens, quid Deo de se placeat immotus exspectat. Ignis ergo globis in astra furentibus, cuncta occupat, cuncta pervadit et non modo cætera quæque succedit, sed et monasterium, heu! tædet dicere, ipsumque servum Dei eum tota sua cellula conflagravit. Quod profecto Dei iudicium non tam discutiendum est quam timendum. Quis enim humanæ mentis intuitus divinorum iudiciorum penetrare valet abyssum, cum sit utique terribilis in consiliis super filios hominum? (*Psal. LXV.*) Quis enim credere potuisse, ut is, qui per revelationem meruit agnoscere periturae urbis excidium, semetipsum ignoraret flammis simul atrocibus exurendum? Hæc igitur et his similia cum mente considero, cum subtili meditatione pertracto, dum quid mihi adhuc immineat, nescio; tremefactis certe totis visceribus obstupesco; moxque ad lacrymas redeo, et si fletus aliquando præ cordis duritia non erumpit, mens tamen ipsa mœrore gravius contabescit. Perpendo sæpe quale sit insatiabilibus subjacere draconibus, inimicis infoederabilibus inter-

A esse, in morte vivere, in ignibus habitare. Illud etiam, quomodo ad cruciandos impios hoc præ cæteris electum sit elementum, ut cum favilla dissiliens, in quolibet membro, vel ad momentum tolerari non possit, ultrices flammæ miseros homines hinc egredientes absorbeant, et infinite patens vorax gehenna concludat. Ex quibus nimirum plura suppeditat animus eloqui, nisi me prohiberet epistolare compendium diutius immorari. Ex qua tamen occasione quiddam nunc redit in mentem, quod non piget breviter adnotare.

Duo viri de primoribus Faventinæ civitatis ex hoc sæculo ante non parvum tempus egressi, cuidam diacono simul apparuere per visum, qui nimirum ferreis casulis in more sacerdotum talotenus ad ima desfluentibus videbantur induiti. Percunctatus autem diaconus, utrumne, inquit, vos, qui in illa vita estis, jugiter Dominum benedicitis? Responderunt: Nos, qui apud inferos æternō igne cruciamur, nunquam benedicimus Dominum. Plane, quod sollicitudinis meæ pondus accumulat, et frater ille, cuius ante meminimus, ut conjici potest, tunc 451 stabat, cum revelationis præsagium meruit; tunc in aliqua sorte culpa jacebat, cum discrimen incurrit. In lubrico siquidem positi, repente prolaborimur; et nunc mundi sub momento temporis inquinamur.

Unde et illud nunc ad memoriam redit, quod in Beneventana olim urbe constitutum audire me contigit. Princeps denique ejusdem civitatis presbyterum habebat sanctæ conversationis virum, et in divinis officiis, ac præcipue in solemnitate missarum indesinenter assiduum. Qui dum quotidie sacris mysteriis reverenter insisteret, angelus Domini ex consuetudine veniebat, et vidente principe, sacramentum Dominicæ corporis ex offerentis manibus assumebat. Sed, o ruinæ vitæ, hujus lubrica et incerta conditio! nam qui angelicis fruebatur mundis obsequiis, in foedæ luxuriæ voragine repente prolapsus est. Quid plura? Peragendi sacri mysterii tempus advenit, presbyter consuetudine foris exigente compellitur; sed graviter intus, conscientia remordente, torquetur; ornatur, accedit, trepidat, palpital, tamen offerre presumit. Ecce angelus, ut assuetus fuerat, venit, et inspectante principe, spongiam infectam aqua super caput illius expressit, totumque corpus ejus tergendo purgavit. Expletis autem mysteriis, eamdem spongiam rursus expressit, omnesque sordes, atque squalores quos ex corpore illius ante contraxerat, membris ejus omnibus iterum supersudit. Hoc viso princeps admiratus obstupuit, presbyterumque semotis omnibus secrete convenit. Inquisitus itaque presbyter, si noviter aliquid criminis admisisset, primo quidem quasi perhorrescens facinus, abnegat; deinde male sibi conscientis, ac principis auctoritate compulsus, tandem corruiisse nocte præterita in quamdam ejusdem principis cubiculariam confitetur.

In eadem rursus urbe vidi monachum cui nomea

erat Madelmus, qui nimis juxta monasterium degens in cellula, inclusus, sive solitarius dicebatur. Hic mihi retulit, quia in sacrosancto paschali Sabbato, Resurrectionem præcedente Dominicam, in Ecclesia, quam frequentare consueverat, quatuordecim plus minus lampades adornavit, et aqua supposita præter unam, omnibus oleum superfudit. Cumque cæteris satisfactum esset; sed deficiente oleo, una remaneret; petivit ab abbate, sed impetrare non potuit. Tandem in fide non hæsitans, aqua lampadem implevit, lumen adhibuit, quæ profecto per totam noctem cum cæteris nihilominus radiavit; et eum naturale sit aquæ ut ignem semper extinguat, illa sovebat. Tunc abbas advocatus in testimonium, signum virtutis admiratus expavit, seseque oleum non dedisse confusus erubuit. Porro et alias quasdam monachus ille dicebatur ostendisse virtutes. Sed yæ illi! clausis oculis securus incedit, et versuti hostis laqueos non attendit. Nam postmodum hic in luxuriæ voraginem corruit, et qui eatenac magnæ reverentiæ principi, ac civibus fuerat habitus, publice virgis cæsus, et sub inhonesto ludibrio turpiter asseritur decalvatus.

#### 452 CAPUT VII.

*Quod res sit maxime ardua aliis præesse.*

Hæc idcirco dixerim, ut liquido pateat, quia in hoc vitæ mortalis itinere gradientibus multæ suppunctiones insidiæ, diversa occultus hostis scandala contegit, multa viscchia struit, plures laqueos atque tendiculas nostris quotidie gressibus anteponit. Dicant ergo mihi, qui volunt episcopare, plebis te regendis expone. Sed qui meipsum nequeo inter tot gladios ac tela protegere; quo pacto et alios possum ex captiosis latentium insidiarum laqueis expedire? Deponenda est ergo sarcina, quam bajuare non possum: meliusque est pondus abjecere, quam cum detimento Domini, cuius sum servus, fractis cervicibus interire. Sufficiat nunc ad testimonium hoc solum beati Hieronymi, quod, needum horâ transacta, sub oculis habuisse me memini. Dum enim de otioso Ecclesiæ pastore tractaret, adjectit: « Illico, inquit, indignantis Domini responsione serietur: Serve nequam, quare non dedisti pecuniam ad mensam, ut ego veniens cum usuris utique exegisset illam? » (Luc. xix.) Quod idem doctor protinus exponens, ait, id est, depositisses ad altare quod ferre non poteras. Dum enim tu ignavus negotiator denarium tenes, alterius locum, quæ pecuniam duplicare poterat, occupasti. Hoc ego sancti viri consilium, fateor, libenter arripui; et onus, cui succumbere compellebar, abjeci. Imo pecuniam, quam duplicare non poteram, negotiator ignavus ad altare deposui.

Fuit, fuit olim, sed jam elapsum est tempus, ut modestiæ pudor, mortificationis insigne, digna severitas, et sacerdotalis genii valeat censura servari. Nam ut me solum digne coarguam, videatis ipsi quia protinus, ut ad vos venio; ecce sales, ecce facetiæ, lepores, urbanitates, dicacitates, volumina quæstio-

A num, omnesque verborum inanum pestes insolenter erumpunt, quæ nos, non jam sacerdotes, sed potius oratores, ac rhetores, sive, quod in honestum est, scurras ostendunt. Mox enim, ut verba conserimus, paulatim quædam lenocinia confabulationis alternæ subrepunt, quæ omnem animi rigorem indecenter emoliant, et severitatis robur in excusum risum, et turpia joca dissolvant. Hinc est, quod mens extra se sparsa confunditur, acies cordis obtunditur, lux divini amoris extinguitur, terror in alios, et reverentia sacerdotalis amittitur; et quod periculosius est, recte vivendi linea, quæ aliis ad exemplum proponenda fuerat, non tenetur.

Quod si nos, vel pudore, vel metu in hæc declinare contemnimus, mox inhumanæ, rigidi et quos Hyrcanæ generint tigres saxei jūdicamur (PLIN. lib. viii, c. 2). Reprimo calatum. Nam, ut turpiores attexantur ineptiæ, pudore suffundor, videlicet venatus, aequalium, alearum insuper furiae, vel scacchorum, quæ nimis de toto quidem sacerdote exhibent minimum; sed præcipue oculos, manus, et linguam, quasi minimum verum simul efficiunt, sive conditos, et qui suavius sapient, cibos dæmonum mensis apponunt. 453 Hic plane, si quid mihi de venerabili Florentinæ sedis episcopo contigerit, recolo, alienum esse ab ædificatione non credo.

Dum aliquando sibi essem comes itineris, vespertinum tandem subeuntes hospitium, ego me in presbyteri cellam semovi; is autem in spatiosa domo cum commeantium turba resedit. Mane autem factio, a meo milii Agasonè significatum est, quod prædictus episcopus ludo præfuerit scacchorum. Quod profecto verbum, velut sagitta, cor meum acutissime pupugit, et indignationis vulnus infixit. Hora autem, quæ mihi videbatur electa, conveni hominem, et acriter invehor. Hoc igitur initiam sermonis arripiens, aio: Librata manu virgas excro, plagas infigere quæro si sit qui terga subjiciat. Et ille, inferatur, inquit, culpa, non recusabitur poenitentia. Rectene, inquam, tuique erat officii, yesperc in scacchorum vanitate colludere, et manum Domini corporis oblatricem, linguam inter Deum et populum mediatrixem, sacrilegi ludibrii contaminatione fœdare? Præsertim cum canonica decernat auctoritas, ut aleatores episcopi deponantur. Et quid prodest ei, quem efficaciter auctoritas damnat, etiam si judicium extrinsecus non accedat. Ille autem ex diversitate nominum, defensionis sibi faciens scutum, ait: aliud scacchum esse, aliud aleam. Aleas ergo auctoritas illa prohibuit, scacchos vero tacendo concessit. Ad quod ego: Scacchum, inquam, Scriptura non ponit; sed utriusque ludi genus aleæ nomine comprehendit.

Quapropter dum alea prohibetur, et nominatim de scaccho nihil dicitur, constat procul dubio utrumque genus uno vocabulo comprehensum, unius sententiæ auctorita e dampnatum. Tunc ille, ut mitis est animi, perspicacis ingeni, redditis rationibus humiliter acquievit, culpam nullatenus iterandam certa

pollicitatione constituit, injungi sibi pœnitentiam postulavit. Cui mox præcepi ut ter psalterium meditando pereurreret, ac duodecim pauperum pedes sub totidem numismatum erogatione eorumque recreatione lavaret. Hac scilicet ratione perspecta, ut quoniam hæc culpa cum manibus potissimum, et sermone committitur, lavando pauperum pedes, suas potius a culpæ contagio manus ablueret: et imprimis alienis vestigiis ora, pacem sibi cum Domino, quem per flendos jocos offenderat, reformaret. Ille autem diximus, 454 ut quam in honestum, quam absurdum, quam denique fœdum sit hoc in sacerdote ludibrium, ex alterius emendatione noscatur.

Præterea, dilectissimi, ut ad id redeam pro quo scribere ista proposui, nolite mihi de cætero esse molesti, ut quietis portum, in quem a Christo per vos gubernante relapsus sum, deseram, et spuman tes procellarum cumulos, confragola volumina, Scyltaeum voraginem denuo sulcare contendam (17). Quamvis enim ego miser, et ille sit sanctus; quia tamen par mihi quodammodo cum Samuele sit causa (Reg. VIII, 16), non dispär promatur super utrumque sententia. Ille siquidem principatus deseruit dignitatem, David tamen unxit in principem. Nos etiam ad ejus exemplum, apostolicæ sedis, auctore Deo, cupimus pontificem ordinare, ac protinus a proprii pontificatus arcé recedere.

(17) Attudit ad munus cardin. ep. Ost.

**A** Ecce, dilectissimi, dum uberioris vobis alloqui verba protraxi, epistolaris regulam brevitatis offendii. Si quis igitur me laciniosæ velit prolixitatis arguere, arguat potius impatiens silentii charitatem: nec ignoret, quia illic est succincta prolixitas, ubi sic styli currentis scriptor extendit articulum, ut tamen toluum pleni pectoris non explicet votum. Stephanum quoque, quem inter primos in mente gestamus, amicos, in epistolæ calce subnectimus, utque memoris non sit immemor obsecramus. Ille miserum Petrum de manibus eruat Hildebrandi, ad cuius imperium magno Petro patuit carcer Herodis.

### SCHOLIA

**B** Illud etiam non dissimili dignum videtur esse formidine quod religioso quodam Pisanæ diœcesis abbatem, etc. Id quod hoc loco sanctus cardinalis narrat de quodam Dei servo incluso, qui et præviderat incendium, quo in cella sua exustus est, hoc ipsum mihi videtur quod Marianus Scotus hisce verbis expressit (Chron. l. iii, ætat. vi, sub ann. 1058): « Podelbruna civitas cum duobus monasteriis feria sexta ante Palmas igne consumuntur. » In monasterio autem erat Paternus nomine, monachus Scotus, multisque annis inclusus, qui etiam combustionem prænuntiabat, in sua cella ambiens martyrium, combustus est. Feria secunda post octayas Paschæ, exiens de Colonia, causa orationis eundem leua visitavi, ob bona quæ narrantur de ejus sepulcro.

*Sit nomen Domini benedictum*

## 455-456 OPUSCULUM VICESIMUM PRIMUM.

### DE FUGA DIGNITATUM ECCLESIASTICARUM.

**ARGUMENTUM.** — Monachum quemdam, quod abbatis se dignitate abdicasset, ut prudentem vehementer commendat: gravissimasque molestias, curas, sollicitudines, negotiorum moles, et pericula, quibus eorum qui monasteriis præsunt, vita resepta est, sic ei ante oculos ponit, ut hujusmodi dignitates non modo non appetendas, sed etiam quam maxime fugiendas esse, apertissime et verissime concludat. Superesse tamen eidem monacho non minoris negotii provinciam scribit, ut tentationes sibi a dæmone infligendas (qui, ut eum in pulcherrimi facti pœnitentiam adducat, omnia conatus esset) propulsare posset, et superare. Proinde illuni monet, ut fortiter se accingat ad hostis impetus excipiendo, ne si contra fecerit in ambitionis fluctus rursus relabi necesse sit.

Domino B. religiosissimo abbatu, PETRUS peccator monachus débitæ servitutis obsequium.

Charissime Pater, dignas auctori bonorum Deo gratias resero, qui te per suum spiritum docuit periculoso hoc tempore aridam virgam vanæ prælationis abjicere, et ad privatam animæ tuæ custodiæ expeditis gressibus festinare. Nunc vere meus abbas esse cœpisti, cum præesse aliis desiisti. Ecce de jugo multigenæ servitatis ereptus, ingenuæ libertati es per Dei misericordiam restitutus. Servum enim te sæcularium, servum te esse necesse fuerat etiam monachorum. Illorum siquidem, ne monasterium læderent; istorum vero, ne tibi conspiratæ factionis scandalum generarent. Illos nempe vere-

**C** baris, ne domus Dei bona diriperent; istos autem, ne domesticæ seditionis adversum te machinas concinnarent. Et dum unum caput tot dominis subditur, infelix anima multiplici quodammodo catena consiringitur ne Creatoris sui vestigia prosequatur. Dic, Pater, dic, inquam, videlicet ut expertus: quis potest hoc ferreo sæculo monasterium sine sui capitinis periculo regere? imo quis potest cum abbatem, simul et monachum possidere? Mox enim, ut quis abbas fieri incipit, monachus esse desistit. et quicunque abbatizandi culmen efflagitat, nihil est aliud, nisi quod monachum velut importabile pondus querit abjicere, et ne apostata videatur, sub fucato se vult colore regiminis palliare. Vide-